

Daniel

Daniel tsu fa'e Babiloniani angaye'su. Tseni can'jemba Chiga tisema in'jaemba fuitesi joccapitssia gobierno shondo'suve da. Tise, tisema faengasundeccu'qqe Na'su Chigave in'jamba dyombi'tsse tisema in'ajamba canse'fa. Ayo'oni Chigaja Danielnga conda osha'cho jai'ngae tsoña'chone cuintsu tevaemba an'biaña.

Israendecuma Babiloniani anga'cho

1 ¹Joacim Judá na'suve dapa tres canque'fave Judáma manda'je'ni Babilonia'su na'su Nabucodonosor tise sundarondeccu'ccu Jerusaléni jipa pa'cco Jerusalén canquema ttu. ²Tsonsi Na'su Chigaja antte cuintsu Nabucodonosor Joacimma patsupa osha'cho Chiga etti'su tasa, apisho'ttoma'qqe isupa angaye. Tsa'caen Na'su Chiga anttesi Nabucodonosorja patsupa aindecuma'qqe indipa Babiloniani anga. Toya'caen osha'cho Chiga etti'su tasa, apisho'ttoma'qqe angapa tise chigandeccu ettinga boña. ³Toya'caen tsu na'su ettini tisema shondo'su Aspenazma manda cuintsu na'su Joacim dutssiyendeccu toya'caen israe'su ti'tsse'tssiandecumbe dutssi'ye'suma attufaemba iye. Nane tsa dusungandeccu ⁴majan ñotssipa, giya'tssipa, injama'pa, ñotsse pañaña'cho, pa'coma atesu'chondeccuma isi na'su ettini shondo'je'faye. Tsendecunga tsu Babilonia'su aya'fama toya'caen tise'pa tayopi'su condase'choma'qqe atesiaña'cho. ⁵Toya'caen tsu na'su Nabucodonosorja manda cuintsu tsa dusungandecungaja pa'cco a'ta tise na'su anque'su, tise na'su cuique'su vinomeñi ofian'jeñe. Nane tres canque'fave tsu atesiaña'cho tisema shondosundeccuve daya'cho nepiya'ngae.

Daniel na'su tsaoni can'jen'cho

⁶Tsa dusungandeccu'ccu tsu can'jen'fa Daniel, Ananías, Misael toya'caen Azarías. Tsendecuta tsu Judá aindecu. ⁷Tsesu inisendecuma tsu na'su tsa'oma coira'suja ccaningae ini'sian: Danielmajan Beltsasar; Ananíasmajan Sadrac; Misaelmajan Mesac; toya'caen Azaríasmajan Abednegove. ⁸Tsa'ma Danielja israe'supa na'su anque'suma amba vinoma'qqe cu'ipa tisu in'jan'choma dañosa'ne chi'ga. Tsa'caen in'jamba

na'su tsa'oma coira'suma ññajan cuintu tsesu añ'a'choma tise'panga afeye mandambe cañe. ⁹Chiga tise ma in'jaensi na'su tsa'oma coira'su na'suja ñotsse Danielma ¹⁰can'boemba su:

—Ña ande na'suma gi dyojo. Tise tsu manda cuintu que'ija tise anqqe'suma amba, toya'caen tise cuiqqe'suma cui'je'faye. Tsama que' chi'gapa faesu dusungandecuma bove paji'suve da'ninda tsu ña na'suja que'ine ñama fi'ttiya.

¹¹Tsa'caen susi Danielja na'su tsa'oma coira'su na'su tise'pama coira'suve manda'chonga afapa qquen su:

¹²—Noa'me gi ññajan aqquia ña suqquia'caen tsoncanjan ingi quema shondosundecunga. Mandaja cuintu ingingaja diez a'tave jo'su jonsi shoyoqqe'su na, toya'caen aqquia tsa'ccuveyi afe'jeye. ¹³Diez a'tave tsa'caen jo'su tsesuveyi afe'jepa ingi ai'voma cambia faesu dusunga tsa na'su anjen'cho'suma an'jendecumbe ai'voma'qqe canjan. Camba ma'caen atte'ta ingingaja tsesuveyi afe'jeja.

¹⁴Tsa'caen su'fasi atesuye in'jamba tise'pama coira'suve manda'choja diez a'ta tsesuveyi afe'je. ¹⁵Diez a'ta pasasi tsendecumbe ai'voja faesu dusunga tsa na'su anqqe'suma an'jendecumbe ai'voma ti'tsse quinsetssipa ti'tsse quin'anme da. ¹⁶Tsama atepa tise'pama coira'suve manda'choja anqqe'su vinoma'qqe afembipa jo'su jonsi sho'yoqqe'su na toya'caen aqquia tsa'ccuma afe'je.

¹⁷Tsa cuatro dusungandecunga tsu Chigaja ante cuintu ñotsse in'jamba pañamba pa'cco tevaen'jeni jinchoma toya'caen pa'cco atesu'choma'qqe atesu'faya'chove. Danielja jongoesuma attian'cho, toya'caen jongoesune ayo'ochoma'qqe atesu'chove da. ¹⁸Na'su naniña'cho a'tave afa'cho nepisi na'su tsa'oma coira'suja poiyl'cco dusungandecuma na'su dyai'chonga anga. ¹⁹Tsa'caen angasi na'suja poiyl'cco dusungandecui'ccu condasepa jo'su cuatroveyi atte cca'indeqquia'ma ti'tsse'tssindeqquia've. Tsendeccu tsu Daniel, Ananías, Misael toya'caen Azarías. Tsa'caen dapa tsendecuja na'suma shondosundecuve ca'ni'fa. ²⁰Pa'cco in'jamba atesuqqe'suma na'su ññajampañasi tsendecuja poiyl'cco Babilonia'su injama'padeqquia toya'caen o'fema cambia ma'caen daya'chove atesu'chondeccuma ñoa'me ti'tsse'tsse atesupa conda'fa. ²¹Danielja tse'ttini can'jen Ciro na'suve dapa mandaya'ngae.

Na'su Nabucodonosor ayo'o'cho

2 ¹Dos canqqe'fave manda'jepa Nabucodonosorja tsain'bitsse ayo'o. Tsa'caen ayo'opa panshaen tsama asi'ttaemba anañe oshambi. ²Tsa'camba manda cuintu injama'pandeqquia, mágiccondecu, jai'ngae daya'choma atesu'chondeccuma, coragandecuma toya'caen atesu'chondeccuma ttu'senga'fasi jipa tise jongoesune ayo'o'choma conda'faye. Tsendeccu jipa tisenga ccutsusi ³na'suja qquen su:

—Ayo'opa gi tisu jongoesune ayo'ochove atesu qquen panshaen asi'ttaemba vana'jen.

⁴Tsa'caen susi atesu'chondeccuja na'suma su'fa:

—¡Ti'tsse joccapitssia've dapa tsangae canseja! Ti'tsse Joccapitssia, que ayo'ochoma ingi quema shondosundecunga condaseja. Tsonsi gi conda'faya jongoesune que ayo'ochoma. ⁵Tsa'caen su'fasi na'suja su:

—Tayo gi qquen tsoñe in'jan. Que'iyi ña ma'caen ayo'ochoma condapa, jongoesune ña tsa'caen ayo'choma conda'faja. Tsa'caen conda'fambian'da gi que'ima getti fi'ttisi tsu que'i tsa'oja jimbitsse sheque catiyepa boñame daya. ⁶Tsa'ma ña ayo'ochoma condapa, jongoesune ña tsa'caen ayo'ochoma conda'ta qui ña afe'cho ñocca'tssiama injan'tsse isupa joccapitssia've da'faya. Tsa'cansi conda'faja ma'caen ña ayo'ochoma, toya'caen jongoesune ña tsa'caen ayo'ochoma.

⁷Tsa'caen na'su susi atesu'chondeccuja ccase su'fa:

—Ti'tsse'tssia, condaseja que ayo'o'choma. Tsonsi gi jongoesune que tsa'caen ayo'ochoma conda'faya.

⁸Tsa'caen su'fasi na'suja qquen su:

—Tayo gi in'jan, que'ija ña ma'caen tsoñe su'choma pañamba qui ti'tsse'tssi a'tave biañañe in'jan'fa. ⁹Tsa'camba qui ma'caen ña ayo'ochoma condambi'ta poiyl'cco fae'ccungayi japa pa'faya. Nane que'ija ña tisu ayo'o'choma condasesi pañamba aquia afo'poemba ña tsoñe in'jan'choma pasaeñe in'jamba qui ña in'janquia'caen conda'fambi. Tsa'cansi conda'faja ma'caen ña ayo'ochoma. Tsonsi gi in'jaña que'i jongoesune ña tsa'caen ayo'o'chove condaye osha'fa'chove.

¹⁰Tsa'caen susi atesu'chondeccuja qquen su'fa:

—Ti'tsse'tssia na'su, me'i'on tsu va andeni que in'ajanquia'caen in'ajansi majan tsane condaya'chove. Toya'caen minga'ni'qqe tsu majan na'su ti'tsse'tsse oshacho'cho'qqe tsa'caen a'i condaye osha'masia've in'ajan'fambi. ¹¹Ti'tsse'tssia na'su, ñoa'me aiye'pave qui in'ajan ni majañi'qqe condaye osha'masia've ñoa'me chigandecuma in'ajanquia'caen. Tsa'ma tsendeccuja a'ini can'jen'fambi.

¹²Tsa'caen su'fasi pañamba na'suja ñoa'me iyicca'yepa manda cuintsu poiyl'cco Babilonia'su atesu'chondeccuma fi'tti'faye. ¹³Tsa'caen manda'choma poiyl'cco pañamba Daniel, toya'caen tise'ccu canjensundecuve'qqe tta'tta'fa fi'ttiye.

Daniel na'su ayo'ochoma conda'cho

¹⁴Tsa'caen poiyl'cco injama'pandecquia'ma fi'ttiye manda'choma in'jamba Danielja egae afasa'ne in'jamba ñotsse afapa Arioc tsa na'sumbe sundaro na'sunga ¹⁵qquen in'ajampaña:

—¿Jongoesune tsu na'suja ñoa'me iyicca'yepa tsa'caen pasambe'yi fi'ttiya'chove manda?

Tsa'caen in'ajampañasi Ariocja conda jongoesune na'su iyicca'ye'choma. ¹⁶Pañamba Danielja na'suni japa in'ajan cuintsu re'riccoe rondaccasi

tise na'su ma'caen ayo'ochoma, toya'caen jongoesune tsa'caen ayo'ochoma condaye. ¹⁷Tsa'caen supa tisu tsaoni japa poiyyi'cco tisei'ccu canjensundecunga condase tsa Ananías, Misael, toya'caen Azariángaqque. ¹⁸Poiyyi'cco pañamba fae'ngae sefacconi can'jen'cho Chigama iñajan'fa cuintsu tise'pama fuitepa ma'caen tsa a'tutsse tson'jen'choma canjaeñe. In'jamba'qqe Babilonia'su atesu'chondeccui'ccu fae'ngae tise'pama fi'tti'fasa'ne. ¹⁹Tsequi cose tsa in'jamba tson'jen'choja attian'choi'ccu Danielnga canjaen. Tsa'caen pa'ccoma canjaensi Danielja Na'su Chigama ñotsse afapa ²⁰qqen su:

“Tsangae ñotsseyi jinchoja Chigambe inise.

Nane tsambeyi tsu atesuqqe'su,
toya'caen oshachoqqe'su'qqe.

²¹ Tsayi tsu canqqe'fa, ccovu, a'ta, cose,
coejefa, sanfane'qqe cambiamba
na'suma somboemba ca'niañe'qqe osha.

Atesu'chondeccunga tsu atesuqqe'suma afe.
Toya'caen injama'pandecunga tsu
ti'tsse in'jan'faya'chove afe.

²² Tsa tsu ñoa'me a'tutsse
osha'chove su'choan'qqe canjaeña.
Tisenejan sinttia'su'qqe tsu a'tatssi.
Nane tiseni tsu a'tatssia'ja jin.

²³ Ña yayandecumbe Chiga, quenga gi
chigatsuafepeañán qqen supa
queve in'jan que ñama atesu'chove tsomba
toya'caen quin'anme tsonsi.
Toya'caen qui ja'ñojan ingi in'jamba
iñajan'choma a'tatsse canjaen.
Tsa'caen qui inginga na'su asi'ttaemba
vana'jen'choma a'tatsse canjaen.”

²⁴Tsa'caen afa nanimba Danielja Ariocni can'su ja. Nane tsama tsu na'suja manda cuintsu Babilonia'su atesu'chondeccuma fitti'ttiye. Tsanga japa Danielja qqen su:

—Injama'pandecquia'ma fi'ttimbe'yi ñama na'sunga angaja ña pa'cco tise ayo'ochoma condaye.

²⁵Tsa'caen susi jundeyi Ariocja Danielma na'su Nabucodonosornga angapa na'sunga su:

—Atte gi judá'sundeccu indiyepa ji'cho'su fae'cco tsu que ayo'ochoma condapa, jongoesune Que Ti'tsse'tssia tsa'caen ayo'ochoma condaye osha.

²⁶Tsa'caen susi pañamba na'suja Danielma su:

—¿Ñoa'me ti qui su? ¿Osha ti qui ma'caen ña ayo'ochoma condapa, toya'caen jongoesune ña tsa'caen ayo'ochoma condaye?

27 Tsonsi Danielja su:

—Me'i'on tsu ni majan atesu'cho ma'caen jai'ngae daya'chove atesu'chondeccu, injama'pa, toya'caen o'fema cambia ma'caen daya'chove atesu'chondeccu, tsa Que Ti'tsse'tssia atesuye injan'choma in'jamba condaya'chove. 28 Tsa'ma fae Chigayi tsu sefaccone que injan'choma canjaen. Toya'caen tsayi tsu Que Ti'tsse'tssia ma'caen jai'ngae daya'choma conda. Ja'ño gi condaya Que Ti'tsse'tssia anamba ayo'opa atte'choma: 29 Que Ti'tsse'tssia ana'jen'choni ccuipa jai'ngae ma'caen daya'choma asi'ttaensi tsu tsa Chiga osha'cho atesu'ma'sia'ma canjaen'suja tsane conda. 30 Toya'caen ñanga'qqe tsu tsane a'tatsse canjaen. Tsa'ma ñajan poiyl'cco atesu'chondeccuma ti'tsse'tssisi atesuchopa que a'tutsse ayo'ochoma ñanga'qqe canjaen qqen in'janjama. Nane ña, Que Ti'tsse'tssia, ayo'ochoma atesupa jongoesune que tsa'caen ayo'ochoma condasi pañamba que atesuye tsu ñanga'qqe Chiga tsa'caen canjaen.

31 “Que Ti'tsse'tssia, qqen tsu que ayo'opa atte'cho: Que Ti'tsse'tssia'ye tsu fae'cco rande a'ive ñoña'cho chhariccotssipa tise ai'vo dyo'tssia jangi. 32 Tsa ñoña'chombe tsoveta tsu pa'cco coriyi. Tise utu'cho toya'caen tise tive tsu totoacorima ñoña'cho. Tise tto'pa toya'caen tise ttena'go tsu cu'a yoshavama ñoña'cho. 33 Tise san'ccoata tsu yoshavama ñoña'cho. Toya'caen tise tsu'tteta tsu ma'ttija yoshavama ñoña'cho; tsa'ma cca'ttija aquia apichama ñoña'cho. 34 Tsama Que Ti'tsse'tssia, caña'jen'ni tsu a'i ccofettambi'ma fae patu, ccotta'cco'ye battin jipa tsa ñoña'cho ccutsu'chombe tsu'ttenga depa tsu'ttema u'cca. 35 Tse'faei'ccuyi tsu yoshava, apicha, cu'a yoshava, totoacori, toya'caen ñoa'me cori'qqe jimbitsse vuvu sheque. Nane coejefani trigoma qqesho'jesi fingian ttonoma metsse angaquia'caen tsu ni minga'vieyi'qqe jincombtsse vuvu sheque. Tsa'ma tsa patu vuvian shequian'suja tse'ttinga ccuipa rande ccotta'ccove dasi pa'cco andema picco.

36 “Tsa tsu que ayo'ocho. Ja'ño gi, Que Ti'tsse'tssia, jongoesune tsa'caen ayo'ochoma condaya: 37 Que, Ti'tsse Joccapitssia, qui poi nasundeccuma ti'tsse'tssia. Nane sefacconi'su Chiga tsu quema na'suve tsomba afe cuintsu osha'chove tsomba quin'sui'ccu mandasi aindeccu quema ñotsse afa'faye. 38 Toya'caen pa'cco a'i, aiña'cho, chhajepa jacanqqe'suma'qqe mandaye antte. Tise tsa'caen anttesi queja tsa cori tsove'caen joccapitssia've da. 39 Que Ti'tsse Joccapitssia manda'je'chombe omboe tsu faesu na'su quene bove'cco ca'niña. Toya'caen omboe tsu cu'a yoshava'can na'su ca'nimba pa'cco andema manda'jeya. 40 Tsambe omboen tsu faesu na'su yoshava'caen quin'an jiya. Nane yoshava pa'ccoma ucca shequianquia'caen tsu tsain'bitssi nasundeccuma patsuya.

41 “Que Ti'tsse'tssia, toya'caen qui atte tsu'tte toya'caen tsu'tte'su tsimian'cco ma'tti apicha, cca'ttija yoshavama. Tsata tsu canjaeñe in'jan nasundeccu attufaccoya'choma. Nane majan quin'an, majan utu'cco've daya'chone tsu tsa'caen ma'tti yoshava cca'tti apichave canjaen. Nane, Que Ti'tsse'tssia, yoshava apichai'ccu

echhoen'choma qui atte. ⁴²Toya'caen tsu'tte'su tsimian'ccota tsu ma'ttija yoshava, cca'ttija apicha. Tsata tsu canjaen manda'je'cho enttingeve quin'amba enttingeve oshambi'choa've. ⁴³Tsa, Que Ti'tsse'tssia, yoshava apichai'ccu echhoen'choma atteqquia'caen tsu tsa manda'je'cho nasundeccuja tise'pa dushundeccuma poini anttecco'faya fae'ngatsse dacañe in'jamba. Tsa'ma mapán tsa'caen tson'jen'an'qqe ñoa'me fae'ngatsse daye osha'faya'bi yoshava apichai'ccu echhoengembiqquia'caen. ⁴⁴Tsa'caen tsendeccu da'je'ni tsu sefacconi'su Chigaja minguite pasa'masia na'suma moesi jipa poiyl'cco nasundeccuma metsse sefaemba tsangae tise'yi na'suve daya. ⁴⁵Tsane tsu tsa patu ccotta'cco'ye a'i ccofettambi'ma battin jipa pa'cco yoshava, cu'la yoshava, apicha, totoacori, toya'caen corima metsse vuvian cati'choja canjaen. Ti'tsse Joccapitssia Chiga tsu Que Ti'tsse'tssianga jai'ngae ma'caen daya'choma tsa'caen canjaen. Tsa ayo'opata tsu ñoa'metsse ayo'o'cho. Toya'caen tsane conda'cho'qqe tsu ñoa'metsse su'cho.”

⁴⁶Tsa'caen susi na'su Nabucodonsorja Daniel cambajufanga tsutta'choi'ccu ccaru dyaipa andenga puntssamba manda cuintsu chiganga afeqquia'caen Danielnga afe'faye. Toya'caen tsu manda ñome'bama'qqe tisenga oque oraen'faye. ⁴⁷Omboe Danielnga su:

—Ñoa'me que'i Chiga tsu poi chigandeccuma ti'tsse joccapitssia Chiga. Tsa tsu nasundeccumbe Na'su toya'caen osha'cho atesu'ma'sia'ma attian'su. Nane queyi qui tsa atesu'masia'ma atesupa condaye osha.

⁴⁸Tsa'caen supa omboe Danielma ti'tsse joccapitssia've tsomba osha'cho ñotssiam afe. Toya'caen Babilonia'su provinciambe na'suve tisema ca'niamba poi tsa ande'su atesu'chondeccumbe ti'tsse joccapitssia na'suve tson.

⁴⁹Daniel iñajanqquia'caen na'suja Sadrac, Mesac, toya'caen Abednegoma'qqe ca'niansi tsu tise Babilonia'su provinciane in'jan'choma tson'jen'fa. Tsa'ma Danielja na'sui'ccu fae'ngatsse manda'je.

A'ia'can'me ñoña'chonga iñajaña'cho

3 ¹Omboe na'su Nabucodonsorja manda cuintsu corima a'ia'can'me ñoña'faye. Nane treinta metro bia'su, toya'caen tres metro rande'suve ñoña'faye tsu manda. Tsa'caen ñoñamba cuintsu Babilonia ande'su Dura qqen inisecho'chombe fae'ngatssia andenga ccutsian'faye tsu manda. ²Tsama nani'fasi tsu manda cuintsu poiyl'cco tsa ande'su nasundeccuma ttu'se'fasi jipa tsama nani'chone fiestaen'faye. Nane gobernadorndeccu, sundaro nasundeccu, provincia'su gobernadorndeccu, mandasi jacansundeccu, tesorerondeccu, ñoquiansundeccu, presidentendeccu, toya'caen poiyl'cco tsa provincia'su nasundeccuma tsu ttu'se cuintsu jipa tise a'ia'can'me ñoñañe mandasi ñoñamba nani'chone fiestaen'faye. ³Tsa'caen ttu'sesi jipa tsu tsain'bitssi a'i tsa ñoña'chonga bo'fa tsama nani'chone fiestañe. ⁴Tsa'caen bo'fasi tsu bo'chonga afa'suve manda'choja quian'me afapa qqen su: “Paña'faja, poi canqqe'su aindeccu toya'caen faesu aya'fangae afa'je'chondeccu'qqe: ⁵Ja'ño tsonjen'cho,

bifano, fororo'cco, fendo'cco ugafin'di toya'caen osha'cho jeñaqqe'suma jeñasi paña'da poiyyi'cco tsu na'su Nabucodonosor mandasi a'ia'can'me ñoña'chonga ccaru dyaipa puntssamba tsanga ñajaña'cho. ⁶Poiyyi'cco majan tsa ñoña'chonga ccarupa tsanga ñajambi'ta tsu jundeyi osha'choma oque'jeye ñoñaccu'su si'nge anchanda'je'chonga ttova caniangel'faya'cho.”

⁷Tsa'caen su'chosi, poiyyi'cco a'i bo'cho osha'cho jenqqe'suma jeñasi pañamba ccaru dyaipa tsa corima ñoña'chonga ñajan'fa.

⁸Tsa'ma majan nasundeccuja na'su Nabucodonosornga japa judá'su aindecu tsu shacaen qqen supa ⁹qqen su'fa:

—Que Ti'tsse'tssiaja, tsangae qui canseya, toya'caen que inisema'qqe tsu tsangae injan'jen'faya. ¹⁰Que ti'tsse'tssia manda'cho tsu qqen: Poiyyi'cco bo'cho tsu osha'cho jenqqe'suma jeña'fasi paña'da junde ccaru dyaipa tsa ñoña'chonga ñajaña'cho. ¹¹Toya'caen majan tsa'caen tsombi'ta tsu osha'choma oque'jeye ñoñaccu'su si'nge anchanda'je'chonga ttova caniangeya'cho.

¹²Tsa'caen tsoña'chove manda'ma tsu majan judá'su aindecu, Que Ti'tsse'tssia in'jamba Babilonia'su nasundecuma manda'suve tson'chondeccu, Que Ti'tsse'tssiam paña'fambi ni que chigandecunga ñajan'fambi. Toya'caen Que Ti'tsse'tssia mandasi corima ñoñamba ccutsian'chonga'qqe ñajan'fambi. Tsendeccu tsu Sadrac, Mesac, toya'caen Abednego.

¹³Tsa'caen su'fasi pañamba Nabucodonosorja ñoa'me iyicca'yepa manda cuintsu Sadrac, Mesac toya'caen Abednegoma tiseni anga'faye. Tsa'caen mandasi tise dyaini tsendecuma anga'fasi ¹⁴na'suja qqen ñajampaña:

—¿Ñoa'me ti qui que'ija ña chigandecunga ni ña mandasi corima ñoña'chonga'qqe ñajan'fambi? ¹⁵¿In'jan'fambi ti qui ma'caen osha'cho jenqqe'suma jeña'fasi junde ña mandasi corima ñoña'chonga ccarupa tsanga ñajaña'choma? Tsa'caen tsombi'ta qui ja'ñoñi oshacho'choma oque'jeye ñoñaccu'su si'nge anchanda'je'chonga ttova caniangel'faya. Tsonsi ¿Jongoesu chiga tsu que'ima ccushaen'me'se?

¹⁶Tsa'caen susi tsa tres dusungandeccuja qqen su'fa:

—Tsane jongoesu qqen afaya'chove me'cho'fa gi. ¹⁷Ingi Chiga, tsa ingi ñajan'jen'cho, tsu osha'choma oque'jeccu'su si'ngeye ccushaemba Que Ti'tsse'tssia ma'caen egae tsoñe injan'cho'ye'qqe ingima ccushaena. ¹⁸Tsa'caen tsonsi qui in'jaña ingija que chigandeccu ni que corima ñoña'chonga ccarupa ñajan'jeña'bi'choa've.

Dusungandeccu si'nge'ye ccusha'cho

¹⁹Tsa'caen su'fasi pañamba na'su Nabucodonosorja tsa tres dusungandecuma ñoa'me iyicca'yepa tise cambia'ju'qqe cutsse da. Tsa'caen dapa manda cuintsu osha'choma oque'jeccu'su si'ngema siete se ñoa'me ti'tsse anchandaen'faye. ²⁰Omboe manda cuintsu tise sundarondeccu'su majan ti'tsse quin'andeccu tsa tres dusungandecuma tandamba si'nge anchanda'jeccunga

ttova ca'niañe. Nane tsa Sadrac, Mesac, toya'caen Abednegoma ttova ca'niañe tsu manda. ²¹Tsonsi tsu tsa tres dusungandeccu toenga na'su ondiccu'jepayi tandañemba tsa si'nge anchanda'jeccunga ttova caniang'e'fa. ²²Nane na'su tise mandaquia'caen jundeyi tson'faye manda'chosi sundarondeccuja tsa'caen tsoñe tsa tres dusungandeccumma indipa si'ngenga ttova ca'niañe jasi si'ngeja quian'me anchanda'jepa tise'panga nepisi ju'rupa pa'fa. ²³Tsa'ma tres dusungandeccuja tandan'choyi si'ngenga amppi'fa.

²⁴Tsa'caen tson'fasi na'su Nabucodonosorja camba cunshoa'me jangipa ñoa'me dyopa afa'chove tise mandasi jacansundecunga qqen afa:

—¿Tres a'iyita ti tandamba si'ngenga ttova moe'fa'chombi?

Tsonsi su'fa:

—Jnn, tseyiccoyi.

Pañamba na'suja su:

²⁵—Nane cuatro a'i tayo ccupayepa mingae dambe'yi si'nge enttinge'ye tsui ja'je'fa'choma gi atte. Fae'ccoja ñoa'me sefacconi'su a'i ai'voa'can tsu.

²⁶Tsa'caen supa Nabucodonosorja osha'choma oque'jeye ñoñaccu'sumbe sombo'ttinga catsepa quian'me qqen fundo:

—Sadrac, Mesac toya'caen Abednego, ti'tsse joccapitssia Chigama shondosundeccu, ¡sombopa ji'faja vani!

Tsa'caen susi tres dusungandeccu si'ngeye sombo'fasi ²⁷poi'yi'cco nasundeccu tse'tti bojin sheque'chondeccu tsendecunga catse'fa. Catsepa can'fanijan ni tise'pa ai'vonga si'nge pporo'chove me'cho'fa tsu. Toya'caen tise'pa tove'su tose'qqe ju'ru zuruchombi ni ondiccu'je'qqe dañongembi toya'caen mingavieyi'qqe juru've'e tssu'jiambitssi.

²⁸Tse'faei'ccuyi na'su Nabucodonosorja qqen afa: “Ñotssia tsu Sadrac, Mesac toya'caen Abednegombe Chiga. Tise sefacconi'su shondo'suma tsu moe cuintsu tise'be ño'an shondosundeccumma si'ng'e'ye ccushaeñe, tsa na'su mandaquia'caen tsombindequia'ma. Nane tise'pa Chigambisi, tsa ñoña'cho chiganga ccarupa iñajan'choma bove ñotsse tsu junde paye, qqen tsu in'jan'fa. ²⁹Ja'ño ñajan manda: Majan a'i, mani'su canqqe, mani'su ande, faesu aya'fangae afa'je'chondeccu can'jeñe'qqe va dusungandeccumbe Chigama egae afa'ta tsu gettiyepa pasi tise'pa tsa'o'qqe osuipa amppipa boñame daya'cho. Nane faesu chiga qqen ccushaeñe osha'chove me'i'on tsu.”

³⁰Tsa'caen supa omboe na'suja tsa tres dusungandeccumma ti'tsse'tssia Babilonia'su nasundeccuve tson.

Nabucodonosor sumbie da'cho

4 ¹“Ñã, na'su Nabucodonosor, gi poi canqqe'su aindecu, poi ande'su, toya'caen poi ccaninga aya'fangae afasundeccu mani'su andeni canjensundeccumma'qqe ñotsse in'jamba conda. ²In'jan gi que'i'qqe ñoa'me ti'tsse joccapitssia Chiga ñanga osha'cho camboeni'tssia've tson'choma pañamba atesu'faye. ³Ñoa'me ñocca'tssi

tsu tise in'jamba canjaen'cho. Tise manda'je'choja tsangae tsu jinchoya. Toya'caen tise oshacho'choma'qqe tsu tsangae canjaen'jen'ña.

4“Ña, Nabucodonosor gi avujatsse na'su tsaoni canse. Toya'caen osha'choma an'biamba gi shacambitsse canse. 5Tsa'ma fae cose anañe ccuipa anamba gi ñoa'me dyo'tssia've ayo'o. Tsa in'jan'cho toya'caen attian'cho tsu ñoa'me ñama dyoña. 6Tsa'caen ayo'opa gi manda cuintsu poiyl'cco Babilonia'su atesu'chondecu ñani jipa jongoesune tsa'caen ña ayo'ochoma ñanga conda'faye. 7Tsonsi tsu jif'a poiyl'cco Babilonia'su injama'pandequia, atesu'chondecu, jai'ngae ma'caen daya'chove atesu'chondecu, toya'caen o'fema camba ma'caen daya'chove atesu'chondecu'qqe. Tsa'caen jif'asi gi ña ayo'o'choma condase. Tsa'ma tsendecuja jongoesune ña tsa'caen ayo'ochoma condaye osha'fambi. 8Osefa'poe tsu Daniel, tsa Beltsasar'qqe ña chigandecune ñotssiave inisian'choaja ji. Tsama tsu ñoa'me joccapitssia Chiga Qquendya'paja angacan. Tise jisi gi ña ayo'ochoma condaseye ashaemba qqen su: 9'Beltsasar, jai'ngae ma'caen daya'chove atesu'chondecumbe na'su qui. In'jan gi quemajan joccapitssia Chiga Qquendyapa tsu angacan. Toya'caen qui osha'cho ma'caen atesu'ma'sia'a'qqe tayo atesu. Na ayo'opa atte'choma pañamba ñanga condaja jongoesune tsa'caen ña ayo'ochoma. 10Qquen tsu ña ana'jen'chonga ccuipa ana'jemba atte'cho:

Enttinge andeni tsu fae quini'jin se'fatssia ccutsu.

11 Tsa quini'jin tsu coemba randeve da.

Tise tsutopaja chiga sefacconi ppo'rotssi.

Nane ande shaca'chone'qqe qui tsama atteye osha.

12 Tsambe najenjan ñoa'me me'detssipa

tise na'qqe ñoa'me tsain'bitssi tsu.

Nane poiyl'cco aña nanitssi tsu.

Toya'caen osha'cho aiña'cho

tsu tise tumbianccuni ccui'fa.

Tise ttembangaja chhiriria tsu

tsao'paemba dusu'cho'fa.

Tsa'ye tsu canse'paja pa'cco andenga sombo'je.

13“ ‘Tse'faei'ccuyi gi Chiga sefacconi'su shondo'su sefaccone ande ji'choma atte. 14Tsata tsu quian'me fundopa qqen afa'je:

Va quini'jima ttuttupa ttembama'qqe cha'ttufaja.

Tise najema joquitssiamba name'qqe shequian cati'faja

cuintsu osha'cho aiña'cho tsambe tumbianccuni

ccuisundeccu ccuyayain ja'faye.

Toya'caen tise ttembani canjen'cho chhiriria'qqe

cuintsu ccuya'faye.

15 Tsa'ma setsa'cho toya'caen setsa'fama'qqe

toe'ttingayi antte'faja.

Nane yoshava toya'caen cu'a yoshava candenai'ccu

tandamba tsampi'su shoshovicunga antte'faja

cuintsu suruno tisenga shequesi
toya'caen osha'cho aiña'cho tseni cansesundeccu'ccu
shoshovima an'jeñe.

16 Toya'caen cuintsu tise injama'cho injiengembitsse dasi
jongoesu aiña'choa'caen dapa
siete canque'fave tsa'caen canseye.

17 Tsa pa'cco tsu ño'an sefacconi'su shondosundeccu canjaen'cho
cuintsu poi aindecu qquen in'jan'faye:

Ti'tsse joccapitssia Chiga tsu
pa'cco va ande'su nasundecuma
ma'caen tsoñe oshacho.

Toya'caen tise tsu majama na'suve tsoñe in'jan'da
tsama na'suve tson.

Nane tise tsu utu'ccoama in'jan'da
tsama poi ande na'suve tson.

18 “Tsa tsu ña, na'su Nabucodonosor, ayo'ocho. Ja'ño, Beltsasar,
condaja jongoesune ña tsa'caen ayo'ochoma. Nane fae atesu'choyi'qqe
tsu ña'suja pañamba condaye oshambi. Tsa'ma queta qui condaye osha
quei'ccu Chiga Qquendya'pa can'jensi.’

19 “Tsa'caen susi pañamba Daniel, tsa Beltsasar qquen inisecho'choja,
jongoesune ayo'ochoma tayo in'jamba dyopa asit'ñaen ccutsu. Tsonsi gi
ña, na'suja, tisema su: 'Beltsasar, ña ayo'ochone, toya'caen condaya'chone
panshaen asit'ñaenjama.' Ña tsa'caen susi tsu Beltsasarja qquen su: 'Ay, tsa Que
Ti'tsse'tssiambe ayo'ocho te ma'caen'qqe que enemigonga tsa'caen daye'can.
20 Tsa Que Ti'tsse'tssiambe atte'cho quini'jin se'fa'tssia, rande, sefacconi
ppo'rotssisi mangae ande shaca'chone atteje'cho, 21 tsa najen ñotssiam
an'bian'cho, toya'caen tsain'bitssi name an'biansi poiyo'cco an'jen'cho, tsa
osha'cho aiña'cho tseni cansesundecuma tumbianquian'su, tsa tise ttembani
chhiriria tsao'pama an'bian'cho quini'jin tsu 22 Que Ti'tsse'tssia'ma canjaen. Nane
que coemba ma'caen ti'tsse joccapitssia've da'choma tsu canjaen. Nane Que
Ti'tsse'tssia, osha'cho ñotssiam an'bian'cho tsu sefacconi ppo'rotsse atapa. Nane
que manda'je'cho'qqe tsu poi andeni ja. 23 Toya'caen fae'cco sefacconi'su ño'an
shondo'su andejipa qquen afa'je'choma qui paña: Tsa quini'jima ttuttupa cati'faja.
Tsa'ma setsa'cho, toya'caen setsa'fama'qqe toe'ttingayi antte'faja. Nane yoshava,
toya'caen cu'a yoshava candenai'ccu tandamba tsampi'su shoshovicunga
antte'faja cuintsu suruno tisenga shequesi toya'caen osha'cho aiña'cho tseni
cansesundeccu'ccu fae'ngae siete canque'fave shoshovima amba canseye. 24 Tsa
pa'cco tsu ma'caen joccapitssia Chiga Que Ti'tsse'tssia'ma tsoña'chove canjaen.
25 Nane Que, Ti'tsse'tssia qui aindecu'ye joquitssipa aiña'chondeccu'ccu
canseya. Vaura'caen qui shoshovima amba canseya. Toya'caen que ai'vonga
tsu suruno shequepa tssipoen'jeña. Tsa'caen qui siete canque'fave canseya.
Nane Joccapitssia Chiga tsu va ande'su nasundecuma ma'caen tsoñe

oshachopa tsayi majama na'suve tsoñe in'jan'da tsama na'suve tson'su qquen in'jaña'ngae qui tsa'caen canseya. ²⁶Tsa setsa'cho toya'caen setsa'fama toe'ttinga antteye manda'cho tsu canjaen Que Ti'tsse'tssia ccase jai'ngae Chiga ma'caen oshacho'choma atesupa na'suve daya'choma. ²⁷Ja'ño Ti'tsse'tssia, ña suqquia'caen qquen tsoncanjan: Ñotsse canseja ti'tsse egae tsincombe'yi. Tisu egae tsincon'choma anttepa va'chandeccuma fuitteye in'janjan. Isha qui tsa'caen tsomba ti'tsse ñotsse, avujatsse, toya'caen opatsse osha'choma an'biambaja canseya.'”

²⁸Pa'cco va condase'cho suqquia'caen tsu na'su Nabucodonosorja da. ²⁹Fae canquque'fa pasasi na'suja tisu na'su Babilonia'su tsa'o omba'su ppappacco'ye tsuí ja'jepa ³⁰qquen su: “Canjan Babiloniajan ñoa'me rande tsu. Ña gi tisu oshacho'choi'ccu ñoa'me va ande'su na'su can'jeña'cho canququeve ñoña cuintsu aindeccu ña oshacho'choma atte'faye.”

³¹Toya tsa'caen afa'je'ttie tsu na'suja sefaccone tisenga qquen afa'choma paña. “Vama pañajan na'su Nabucodonosor. Que manda'je'chota ja'ñojan quembebi tsu. ³²Nane aindeccu'ye joquitssipa qui aña'chondeccui'ccu canseya. Toya'caen siete canquque'fave qui vaura'caen shoshovima amba canseya. Tsa'caen qui canseya joccapitssia Chiga tsu poi andeni cansesundeccuma ma'caen tsoñe oshachopa majama na'suve tsoñe in'jamba tsama na'suve tson'su qquen in'jaña'ngae.”

³³Tsa'caen susi pañamba tse'faei'ccuyi Nabucodonosorja tsa'caen dapa aindeccu'ye joquitssi. Tsa'caen joquitssipa vaura'caen shoshovima an'jen. Toya'caen suruno'qqe tise ma tssipoensi tise tose'qqe pindo tose'caen bia'ave dapa quitsuicco'qqe bia'ave da jongoesu pindo rande quitsuiccoa'caen.

Nabucodonosor ccusha'cho

³⁴“Siete canquque'fa pasapa ña ccushaya'cho a'ta nepisi gi ña Nabucodonosor sefacconima cambia in'jan tisu sumbie da'choma ccusha'chove. Tsa'caen ccushapa gi joccapitssia Chiga tsangae canse'suma ñotsse afapa qquen su:

Tise oshacho'choja tsangae tsu quiña'jeña.

Toya'caen tise manda'je'cho'qqe pasambe'yi
tsangae tsu jinchoya.

³⁵Va ande'su a'i majan tisia'can'me me'i'on tsu.

Tise tsu tson'jen ma'caen tisu in'janquia'caen,
sefacconima, toya'caen andenima'qqe.

Nane majañi'qqe, ti'tsse'tssia qquen in'jamba, tise oshacho'chone
toya'caen tise in'jamba ma'caen tson'chone—

¿Jongoesie qui tson? ¿Ma'caen qui tson? inajampaña'chove me'i'on tsu.

³⁶“Tse'faei'ccuyi gi ñotsse in'jamba tisu joccapitssie manda'je'choma, tisu ñotssiama an'bian'choma, toya'caen tisu ti'tsse'tssia'ma'qqe ccase an'bian. Tsonsi tsu ña na'suite ñama shondosundeccu, toya'caen ña

ti'tsse'tssiandequua've tson'chondecu ñame ttatta'su ji'fa. Tsomba tsu ñama ccase tsa ande'su na'suve ca'nia'fasi gi tayoe tisu an'bian'choma ti'tsse'tsse an'bian.

³⁷“Ja'ñojan ña Nabucodonosor gi sefacconi'su Na'suve in'jamba tise ñotssianga in'ajan'jen. Nane pa'cco tise tson'cho tsu ñoa'metsse tson'cho; tansintsse tson'cho tsu. Toya'caen tsu osha 'ñajan ti'tsse'tssi gi' qquen in'jan'chondecuma vanaemba ñombi'yeañe.”

Ttuccunga tevaen'chone condase'cho

5 ¹Babilonia'su na'su Belsasar tsu tsain'bitssi tsa ande'su nasundeccuma ttu'sepa rande fiestave fiestaen'jen. Tsa'caen tson'jemba na'suja tise ttu'sesi ji'chondecu'ccu an'jemba tsain'bitsse vinoma'qqe cui'je'fa. ²⁻³Tsa'caen avujatsse vinoma cui'jepa ccusipa na'su Belsasarja in'jan tise yayaccashe'ye Nabucodonosor'ye Jerusaléni'su Chiga etti'su cori tasa toya'caen totoacori tasama i'choma. Tsa'caen in'jamba manda cuintu tsa tasama i'ngapa tiseni i'faye. I'fasi tsesu tasanga na'su, tise pushendeccu, tise ambian'chondecu, toya'caen poi'yi'cco tsa fiestani canjensundeccu'qqe cui'je'fa. ⁴Tsa'caen cui'jepa poi'yi'cco tise'pa ñoña'cho chigandeccunga in'ajan'fa. Nane majan cori chiga, majan totoacori, majan cu'a yoshava, majan yoshava, majan quini'cco chiga, toya'caen majan patuma ñoña'cho chiganga tsu in'ajan'fa.

⁵Tse'faei'ccuyi tsu a'i tive tuño chhara'faye attiamba ttuccu'su utufani totoa jinchonga tevañe ashaen. Tsa'caen a'i tive attiamba tevaen'choma atepa na'suja ñoa'me dyopa ⁶inzu'tsse dapa pa'cco ai'vo ttun'dundul'jeve da. ⁷Ombae fundopa ttu'se cuintu poi'yi'cco Babilonia'su injama'pandequua, jai'ngae ma'caen daya'chove atesu'chondecu, toya'caen o'fema camba ma'caen daya'chove atesu'chondecu'qqe ji'faye. Tsa'caen fundopa qquen su:

—Majan a'i va tevaen'choma camba atepa jongoesune su'choma ñanga conda'ninda gi na'sumbe cu'a sarupa ondicu'jema tisenga ondiqquiamba tise tsifonga'qqe cori candenama andiaña. Toya'caen ña manda'je'cho'su tercer na'suve gi tsoña.

⁸Tsa'caen susi poi'yi'cco na'suma shondo'su injama'pandequua tseni ca'ni'fa. Tsa'ma majañi'qqe tsa tevaen'choma camba pañamba na'sunga condaye osha'fambi. ⁹Tsa'caen osha'fambisi na'suja ñoa'me dyopa pa'cco camba'ju inzu'tsse da. Toya'caen nasundeccu bojin sheque'chondecu'qqe ma'caen tsoña'chove atesu'fambi. ¹⁰Tsa'ma tsa na'sumbe mama tise dutssi'ye toya'caen poi'yi'cco bopa fiestaen'jendeccu fundo'je'choma pañamba tseccuni ca'nimba qquen su:

—Que Ti'tsse'tsiaja, cuintu tsangae canseja. Panshaen tsane asi'ttaemba inzujama. ¹¹Nane que manda'je'choni tsu can'jen fae a'i ño'an Chigambe Qquendya'pa angacan'cho. Que Ti'tsse'tssiambe yayaccashe'ye na'suite tsu tsa a'ija a'tatsse canjaen tiseja chigandequua'caen ñoa'me injama'pave. Tsa'cansi tsu

que ti'tsse'tssiambe yayaccashe'ye Nabucodonosor'yeja tisema inisian poiyl'cco va ande'su injama'pandeqquia, jai'ngae ma'caen daya'choma atesu'chondeccu, toya'caen o'fema camba ma'caen daya'chove atesu'chondeccumbe na'suve.

¹²Tsa tsu Daniel. Tsama tsu que yayaccashe'ye na'suiteja Beltsasar qquen inisian. Tsani tsu Chiga Qquendya'pa can'jemba in'jaensi ñoa'me injama'pa've dapa osha'choma pañamba in'jañe atesu. Toya'caen jongoesune ayo'ocho ma'caen in'jamba conda'masia'ma'qqe condaye osha. Ma'caen tise conda'ninda tsa'caen tsu daya. Tsa Danielma ttu'seja, Ti'tsse'tssia. Tsa tsu va ttuccu utufanga tevaen'choma camba jongoesu qquen su'choma condaye osha.

¹³Tsonsi Daniel na'suni i'fasi na'suja tisema ñajampaña:

—¿Que ti qui Daniel, tsa Judea andema ña yayaccashe'ye Nabucodonosor'ye patsupa indipa i'chondeccu'su? ¹⁴Nane paña gi queni Chiga Qquendya'pa can'jemba in'jaensi queja osha'choma a'tatsse in'jamba ñoa'me injama'pa, toya'caen atesu'cho qquen. ¹⁵Nane poiyl'ccoma ti'tsse va ande'su injama'pandeqquia tsu va'tti can'jen'fa va tevaen'choma camba jongoesu qquen su'choma ñanga condaye. Tsa'ma ni paña'baeñi'qqe paña'fambi. ¹⁶Nane queja osha'cho aye'pa atesupa conda'masia'ma'qqe condaye osha qquen gi paña. Ja'ño que oshapa va su'choma camba jongoesu qquen su'choma ñanga conda'ninda gi na'sumbe cu'a sarupa ondiccujema ondiquiamba que tsifonga'qqe cori candenama andiaña. Toya'caen ña manda'je'cho'su tercer na'suve gi tsoña.

¹⁷Tsa'caen susi Danielja qquen su:

—Ñanda gi pa'cco va ttuccu utufanga tevaen'choma Que Ti'tsse'tssianga jongoesu qquen suye in'jan'choma condaya. Tsa'ma que afeye su'choja cuintu pasaja; tsambi'ta majan que'ccu na'su tsaoni can'jeñe injan'chonga afeja.

¹⁸“Nane joccapitssia Chiga tsu na'suve tsomba osha'cho jincho'cho ñocca'tssiam, toya'caen ti'tsse'tssia'ma Que Ti'tsse'tssiambe yayaccashe'ye Nabucodonosor'yenga afe. ¹⁹Tsa'caen ti'tsse osha'choya'chove afesi tsu mani'su canque'su aindeccu, mani'su andesundeccu, toya'caen faesu aya'fangae afalje'chondeccu'qqe tisema dyoe'sui'ccu pañamba ñoa'me dyopa ttun'dundu'je'fa. Tsa'cansi tsu tise majama fi'ttiye in'jan'da fi'ttipa majama antteye in'jan'da antte cuintu canseye. Majamanda tsu ti'tsse'tssia've tson, toya'caen majamanda tsu ñombilyamba vanae. ²⁰Tsa'ma tise injama'cho, toya'caen tise in'jan'cho poiyl'ccoma patsu qquen in'jansi Chigaja tise dyaipa'cho'ye joquitssiamba tise ñotssiama'qqe joquitssian. ²¹Tsa'caen joquitssiansi aindeccu'ye joquitssipa aiña'cho in'janquia'caen in'jamba tsampi'su boroi'ccu fae'ngae canse. Nane vaura'caen tsu shoshovima amba canse. Toya'caen suruno'qqe tsu tise ail'voma tssipoen'jen. Tsa'caen tsu canse qquen in'jaña'ngae: 'Joccapitssia Chiga tsu poi va ande'su nasundeccuma ma'caen tsoñe in'jan'da tsa'caen tsoñe osha. Toya'caen tise tsu majama na'suve tsoñe in'jan'da tsama na'suve tson.' ²²Ja'ño Ti'tsse'tssia Belsasar, ma'caen tise da'choma atesu'chopa tsambe dutssi'ye'qqe qui ni

ñoquimbi'coo canjeñe in'jambi. ²³Tsa'camba qui sefacconi'su Na'suma dañomba mandasi Chiga etti'su tasama va cui'jeni ifasi poiyl'cco que ttu'se'chondecu tsesu tasanga vinoma cui'jepa tisupa ñoña'cho chigandecunga in'ajan'fa. Nane majan cori chiga, totoacori, cu'a yoshava, yoshava, quini'cco chiga, patuma ñoña'cho chigandecunga qui in'ajan'fa. Nane tsa atteye ni pañañe ni jongoesuveyi'qqe atesu'chombindequua chiganga qui in'ajan'fa. Tsa'ma Que Ti'tsse'tssiam cansian'su Chiganga, tsa que ma'caen tson'jeña'chove tson'su Chiganga, qui in'ajan'fambi. ²⁴Tsa'can'fasi tise tsu tivema moe cuintsu va afa'chove tevañe. Qquen tsu afaye: ²⁵MENE, MENE, TEKEL, y PARSIN. ²⁶MENE, qquenda tsu afaye: Chiga tsu Que Ti'tsse'tssiambe manda'je'choma agattopa naniña'chove canjaen. ²⁷TEKEL, qquenda tsu afaye: Que Ti'tsse'tssiam agattosi qui queja shaca. ²⁸PARSIN, qquenda tsu afaye: Que Ti'tsse'tssiambe manda'je'cho qui medosundeccu toya'caen persandecunga patsuyeya.”

²⁹Tsa'caen condasi tse'faei'ccuyi na'su Belsarja manda cuintsu Danielnga na'su cu'a sarupa ondiccujema ondiqquiamba tise tsifonga'qqe cori candenama andian'faye. Toya'caen tsu junde poiyl'ccongongonda ma'caen Daniel tise manda'je'cho'su tercer na'suve da'choma.

³⁰Tsequi cose'yi tsu Babilonia'su na'su Belsarma fi'tti'fa. ³¹Tsa'caen tsomba Media ande'su a'i, Darío, tise manda'je'chonga ca'ni. Daríoja sesenta y dos canque'fave an'bian'cho tsu na'suve da.

Daniel ttesi changoni ccusha'cho

6 ¹Na'su Daríoja ciento veinte gobernadorondecuve tsomba manda cuintsu poi provinciani fae'cco, fae'cco can'jen'faye. ²Toya'caen tsu tres a'i presidentendecuve manda cuintsu gobernadorondecuve caña'jen'faye. Tsa'caen tsu na'suja tson jongoesuma qqueñasa'ne. Tsa presidentendeccu'su fae'cco tsu Daniel ³tsa tise'ccu fae'ngae presidentendecuma ti'tsse injama'pa. Tsa'cansi tsu na'suja in'jan Danielma poiyl'cco nasundecuma ti'tsse'tssia've tsoñe. ⁴Tsama in'jansi tsu fae'ngae presidentendeccu, toya'caen gobernadorondecu'qqe ma'caen tsomba tise egae tson'choma attepa na'sunga tsesuma egae tsomba shacaen qquen suye in'jamba tta'tta'fa. Tsa'ma Danielja ño'a'me ñotssia a'isi jongoesu shacama atte'fambi. Tsa'camba osha'fambi jongoesu tson'choi'ccu tisenga shacave tsoñe. ⁵Tsa'camba tsain'bitsse tsane asit'aa'mba qquen su'fa: “Tise ma'caen Chigave in'jan'cho toya'caen ande na'su ma'caen mandaya'chove in'jamba tsombi'ta, ma'caen Danielma egae tsoña'chove atte'faya'bi gi.”

⁶Tsa'caen in'jamba presidentendeccu toya'caen gobernadorondecu'qqe na'su Darío'ccu afaye in'jamba japa tise dyaini nepipa qquen su'fa:

—Que Ti'tsse'tssia'ja cuintsu tsangae canseja. ⁷Poiyl'cco que mandasi na'suve da'chondecu gi bopa in'jan'fa cuintsu que tevaen'jema tevaemba poiyl'cco a'inga que manda'chove canjañe: Cuintsu treinta a'tave majaña'qqe jongoesu chigama ni a'ima in'ajambeyi jo'su Que Ti'tsse'tssia'veyi

in'ajan'jen'faye. Nane majan tsa'caen tsonbi'ta tsu ttesi changonga ttova catiyeya'cho. ⁸Tsa'caen Que Ti'tsse'tssia, mandapa tisu inisema tevaenjan cuintsu tsangae tsa'caen tsoña'chove jinchoye. Nane medondeccu toya'caen persandeccu manda'cho pasa'masia've jinchoquia'caen tsu mandaya'cho.

⁹Tsa'caen su'fasi na'su Daríoja tsendeccu caña'jen'ni tsa'caen mandapa tisu inisema tevaen. ¹⁰Tsa'caen mandapa na'su tisu inisema tevaen'choma in'jamba Danielja tisu tsaoni ja. Japa tisu anambaccunga ca'nimba Jerusalén canque jinfa'su ventanama fettapa ccaru dyai Chigama in'ajamba tisenga ñotsse afaye. Tsa'caen tsu fae a'ta tres se Chigama in'ajamba canse. ¹¹Tsa'cansi tsu tisema vanaeñe in'jan'chondeccu'qqe fae'ngae Daniel tsa'onga ca'nimba tise Chigama in'ajamba tisenga ñotsse afa'je'choma atte'fa. ¹²Tsa'caen atepa jundeyi na'su Daríoni japa tise manda'chone afapa qqen su'fa:

—Que Ti'tsse'tssia qui poi'cco a'inga manda cuintsu treinta a'tave majañi'qqe jongoesu chigama ni a'ima in'ajambe'yi jo'su Que Ti'tsse'tssia'veyi in'ajan'jen'faye. Nane majan tsa'caen tsonbi'ta tsu ttesi changonga ttova catiyeya'cho. ¿Ñoa'me tsa'can ti?

Tsonsi na'suja su:

—Ju, tsa'can tsu. Nane tsa manda'choja medondeccu, toya'caen persandeccu manda'quia'caen tsu pasambe'yi naningeya'cho.

¹³Tsa'caen susi pañamba tsendeccuja ti'tsse afapa qqen su'fa:

—Tsa Judá'suma indipa i'cho, Daniel, tsu Que Ti'tsse'tssiam ni va que tevaemba manda'choma pañambi. Nane tayo gi atte'fa tiseja fae a'ta tres se tsu tise Chigama in'ajan'jen.

¹⁴Tsama pañamba na'suja ñoa'me ñombi'yepa ma'caen tsomba Danielma ccushaeña'chove tta'tta. Nane tsequi a'ta cose'tsse ma'caen ¹⁵Danielma tsa paya'cho'ye ccushaeña'chove asi'ttaen'jen'ni tsendeccuja ccase na'suni jipa qqen su'fa:

—Que Ti'tsse'tssia qui pa'ccoma ñotsse atesu ma'caen medondeccu, toya'caen persandeccu in'jansi na'su mandapa tisu inisema tevaen'choma se'papa pasaen'masiave.

¹⁶Tsa'caen su'fasi na'suja manda cuintsu Danielma ipa ttesi changonga ttova moe'faye. Tsa'ma toya tsa'caen tson'fambi'te na'suja Danielnga qqen su:

—Que Chiga, tsa que ñoa'me in'jamba tsain'bitsse shondocan'cho, tsu quema ccushaeña.

¹⁷Tsa'caen Danielma changonga ttova moemba patuma ipa tsa patui'ccu chango sombo'ttima picco. Piccopa na'suja tsa patuma setsaenque'sui'ccu setsaemba tisu ñoa'me na'su sotijai'ccu setsaenque'sunga pisa tevaen. Toya'caen poi'cco faesu nasundeccu'qqe tise'pa sotijai'ccu tsa'caeni tevaen'fa. Tsa'caen tsu tson'fa cuintsu poi'cco ñoa'me na'su tson'chove atesupa tsa ttesi chango'ye Danielma somboembe can'faye. ¹⁸Tsa'caen tsomba na'suja tisu na'su tsaoni japa ambeyi anañe ccui. Nane tisu tayoe toya avujatssi'te

tsinconquua'caen tsombe'yi tsu anañe ccui. Tsa'caen ccuipa tsequi coseja anambitsse a'ta. ¹⁹Tsa'caen a'tapa sinte'yi jangipa quian'me buttopa ttesi changoni ja. ²⁰Tayo pporotsse japa na'suja ñoa'me ñombi'ye'cho aya'fai'ccu Danielma qqen afa:

—Daniel, Cansian Chigama shondo'su, ¿que Chiga, tsa que ñoa'me in'jamba tsain'bitsse shondocan'chota ti ttesindeccu'ye quema ccushaëne osha?

²¹Tsonsi Danielja su:

—Ti'tsse cansejá, Ti'tsse'tssia. ²²Ña Chiga tsu tise ma sefacconi'su shondo'suma ñani moe cuintsu ñama mingae tson'fasa'ne ttesi aya'fama piccoye. Nane Chigata tsu atesu ñajan ño'an a'ive, toya'caen ñajan mingae Que Ti'tsse'tssiama egae tsincombi'choa've.

²³Tsonsi na'suja avujapa manda cuintsu Danielma tsa chango'ye somboen'faye. Somboemba cambia ni fae fuchha'ttiveyi'qqe atte'fambi tise Chigama in'jansi tise ma mende'yepa ccushaensi. ²⁴Omboe na'su mandasi tsa Danielma egae tsonsundeccuma toya'caen tise'pa pushendeccu, tise'pa dushundeccuma'qqe indipa ipa tsa ttesi changonga ttova moe'fa. Tsendeccuma tsa'caen ttova moe'fasi ttesi ja toya tise'pa amppimbi'te tayo ronda'jepa aiye'je tise'pa amppi'ninda jimbitsse an cati'fa.

²⁵Tsama atepa na'su Daríja poi andenga, toya'caen poi faesu aya'fangae afa'je'chondeccunga'qqe qqen afa'chove tevaen: “Que'ima in'jamba gi opatsse, toya'caen avujatsse vama tevaemba in'jamba que'ima manda. ²⁶Nane pa'lcco ña manda'je'cho tsu Daniel Chigama dyoe'sui'ccu paña'faya'cho.

Tsa tsu ñoa'me Cansian Chiga,
toya'caen tsangae tsu jinchoya.

Tise manda'je'cho'ni tise oshacho'qqe
pasaya'bi ni sefaya'bi.

²⁷Tsayi tsu ccushaen'su, toya'caen fetta'su.

Tsayi tsu sefacconi toya'caen andeni'qqe
osha'cho ñotssiama canjaen'su.

Tsa tsu Danielma ccushaen ttesi'ye.”

²⁸Toya'caen Danielja ti'tsse'tssia've dapa can'jen na'su Darío manda'jeite, toya'caen Persia ande'su na'su Ciro mandajeite'qqe.

Tsangae pasaya'cho

Can'jamba Danielja ti'tsse attian'choma atepa tise aindeccune Na'su Chigama ñoa'me in'ajan'jen. Persia'su na'su tres can'que'fave manda'je'ni lino sarupama ondiccuch'o'cho a'ija chanjumba Danielnga attian. Attiamba osefaeña'cho a'ta tsoña'chone condasepa Danielnga qqen su:

12 ¹“Tse'faei'ccuyi tsu joccapitssia Chigama sefacconi'su shondo'su, Miguel, tsa que aindeccuma coirapa sepi'suja attiaña. Tsequi tsu ñoa'me dyo'tssiya. Nane minguite'qqe tsu tsa'caen da'choja

attiami tseyi poi aindeccuve agattointe'qqe.

Nane tsequi a'ta nepisi tsu poi'cco

que aindeccu, tayo tseni'su tevaen'jenga

tisupa inisema tevaenge'chondeccuja, ccusha'faya.

²Toya'caen tsain'bio papa atuye'chondeccu

ccase qqquendyapa majanda tsangae tsu canse'faya.

Tsa'ma majanda ansangepa tsangae tsu vana'jen'faya.

³Tsequi tsu majan injama'pandeccupa,

tsain'bio a'inga tansintsse atesiansundeccuja,

sefaccoa'caen chanjun'faya.

Nane, ¡tsangae tsu o'fea'caen chanjun'jen'faya!

⁴“Tsa'ma queja, Daniel, va su'choma ñotsse condambe'yi an'bianjan.

Nane va tevaen'jema piccopa setsaenqqe'sui'ccu ancaenjan osefaeña'cho

a'ta nepiya'ngae. Tsain'bio a'i tsu cca'tti cca'tti jacan'faya osha'choma

ti'tsse atesuye.”

⁵“Tsonsi ña Daniel gi faesu dos a'ima atte, fa'e na'en vaofani

ccutsu'choma, faesuja na'en jovofani ccutsu'choma. ⁶Tsa lino

sarupama ondiccucho'choja toya na'en ombani ccutsusi fa'e tsa'suyi

tisema ñajampaña: ‘¿Minga'ni tsu va joccapitssia tsoña'choja nepiya?’

⁷Ñajampañasi tsu lino sarupama ondiccucho'choja poifa'su tivema

sefaningae yasapa su: ‘Na'su tsangae canse'cho Chigaja tansintsse conda

tres canque'fa faesu enttinge canque'fa pasasi tsu tsa'caen nepiya. Nane

Chiga in'jan'cho aindeccu patsuyepa quin'su me'choe da'fasi tsu pa'cco va

tsoña'choja nepiya.’

⁸“Ñajan tise su'choma paña'ma atesumbipa ñajampaña: ‘Na'su,

tsa'caen tson'cho pasa'ta ¿mingae tsu daya?’ ⁹Ñajampañasi tiseja su:

‘Daniel, ti'tsse ñajampañajama. Nane va condase'choja osefaeña'cho a'ta

nepisi atesuya'cho. ¹⁰Toya nepimbi'te tise'pama noñangiansi tsain'bio a'i

osha'choi'ccu vanasundeccu tsu ñotssia giya'tssive sombo'faya. Tsa'ma

egae tsinconsundeccu tsu ti'tsse egae tsincomba canse'faya. Nane egae

tsinconsundeccuja Chiga ma'caen tsoña'choma atesu'faya'bi. Tsa'ma

injama'pandequiaja tsama in'jamba atesu'faya. ¹¹Chiganga poi a'ta oque

oraemba afe'je'choma antte'fasi mil dosciento noventa a'ta pasasi tsu egae

dyoña'suma Na'su Chiga ettinga ccutsiaña cuintu tsangae dañõe. ¹²Nane

avujatssiya tsu majan a'i ti'tsse ronda'jepa mil tresciento treinta y cinco

a'tave nepian'da. ¹³Tsa'ma queja, Daniel, can'jemba, papa ño'faja. Nane

osefaeña'cho a'ta qui ccase qqquendyapa quenga afeya'choma isuya.’”